

平樂府志卷二

輿地部二

山川

平樂縣

昭山城西灘樂二水合流之處有石山突起中流名曰昭山唐州之名昭以此其方正如印又名印山上有點翠亭水面有釣鰲磯石碣西山即昭山距城西百步名勝志有巨石徑百尺屹然水中如神龍戲珠狀方輿勝覽八景之一曰昭山點翠

縈山在城東南七里高二百餘丈縈迴曲折上有九峯曰高崖曰羊欄日月巖曰堦盤曰馬鞍曰跨

平樂府志

卷二 山川

蹬曰石劍曰丫髻爭妍競秀

鳳凰山在城東北隅鼓翼引吭勢如飛鳳明副使張祐於正德初年植高松千樹干霄拂雲今僅寥寥五株矣舊志鳳凰山城跨其上方輿勝覽上有梅公亭遺址宋景佑中龍圖梅公摯守郡時建名勝志八景之四曰鳳岫晴寒

按松五株今僅存一株挺秀城東矣

魯溪山在城東百里東鄉里筆頭堡東南數里環跨平恭富賀永五州縣山上有塘方廣數畝俗呼為分水塘塘出平樂東鄉曰魯溪江出龍平曰澇源出恭城曰上平江出富川曰白稿江





西五里曰疊秀山高數丈舊名八公山舊志疊秀山  
山在魯溪山西五里高數丈省志八峯挺秀舊名八  
公山

蒙山在城南十里

烈陽山在城北二十里

密山在城北十里數峯迴環合擁縣治

黑山在城東南五里儼如玉筍瑤簪矗於霄漢土  
人以此地石黑多陰因名黑山脚平樂合黃大成  
為易其名曰峯嶸山

東山在城東二里舊有鎮粵臺久廢上建壽佛菴

南山在城南四里昭潭南岸雙峯挺出峯下有巖

平樂府志

卷二 山川

二

舊有資聖寺通志云俗呼屏風山舊志昭潭南岸有

南山山半有雙峯巖方輿紀要

北山在城北六里有白衣寺久廢

聖山在樂山里以譚氏二女尸解於此而名巍峩  
插天絕頂高平俗呼仙殿石前有梳妝臺左右列  
翠竹二枝清風徐來爽氣瀟然名勝志

誕山一名聖山在城東南八十里樂山里巍峩插  
天五代時有譚氏二女修黃老術仙去立廟祀之  
禱雨輒應舊志誕山府東北八十里有山峯皆峻拔

方輿紀要亦有三峯譚氏二女產此山下及長修黃老  
之術不知所之一日里人以不雨為憂二女至謂



之曰汝能餉我即可得雨翁第餉之未信也二女甫去果大雨如注翁知其神追覓不見山下呼之則上應山上呼之則下應循至一巨石四圍無草木二女衣帶在焉翁異之白其事於衆是後恒見二女於石上櫛髮因建廟山下祀焉各勝志八景之六曰仙巖靈雨

按舊志誕山一名聖山與省志異疑卽相連之山峯內各一山從省志改定

眉山在東南九里聳秀如黛

陽里穴縣東三十一里有那溪穴皆出鍾乳元和志

團山在城東十五里有堡今廢

平樂府志

卷二

山川

三

石棋山在城東三十里

雲山在城東南四十里四垂如雲

掛榜山在昭潭南岸識云榜山見崩兄弟同登齊志

在五馬山南四里方輿紀要

白雲山在城東八里

笏山在城西三十里左江道宋翔書萬笏朝天四字於上

五馬山府江南岸突起五峯中一峯高聳端圓與郡城相對因名

石面山在城東七十里樂山厓

白山在城北二里



獨秀山在城南五里南山前高數十丈峻峭特起

洛山在城東北五里

公婆山在安樂里

公思山在安樂里

校椅山在東鄉里

越王山在城外

宋鄒忠公清華閣記越山拂於龍嶽

井頭山在東鄉里

華蓋山在城西南十里荔浦江岸其高萬仞

舊華志

蓋山府西十里一名火燄山以山峯尖聳而名

方輿

紀夕陽返照有似火燄明初解縉詩云火燄山危

下夕陽即此山

名勝志

高萬仞尖峯峻削無樹木四

平樂府志

卷二

山川

四

時蒼翠

一統志

山接荔浦江岸峯巒閃爍秀色飛空

遠映城市碧雲恒覆山頂或橫山如帶朝暮卷舒

變化萬狀山濛則雨山開則霽占驗如操左券

省志

展誥山在華蓋山西

旗山在城東四十里

雙峯山在城南三里

鷄山在津平里

鑿山在樂山里

崑崙山在城東南九里

水山在東鄉里

青獅山在城北教場有感應泉在其下舊有直節



清踪亭今廢俗呼爲戲毬堆者在山之麓康熙二十二年文副總以此堆碍馬收韁剗平之

華山在城東

馬鞍山有二一在城東三十里東鄉里一在樂山里

葉山在上廂

琉璃山在東鄉里色如琉璃

塘頭山在城東南

葦菜山在津平里

馬山有二一在東鄉里一在安樂里

擺山在下廂

甌山在東鄉里其形如甌平原十里突出一峯頂平如掌路似羊腸鳥道僅容一人側行居人遇亂往往結廬山半以避平時載酒登眺萬山環翠亦奇勝也

楓山在東鄉里

木山在東鄉里

四山在東鄉里

矮山有二一在東鄉里一在安樂里

平山有二一在東鄉里一在樂山里

負羶山在城東五十里形如負羶俗呼押春羅謂押諸峯而羅春色也樵人每當吻渴於無意中嘗



遇石泉流於曲沼金鱗鼓浪綠荇浮波修竹菖蒲  
叢生佳卉香氣襲人

松山在東鄉里

金山在東鄉里

桃竹山在東鄉里

滑山在東鄉里

大蟲山在樂山里

白棍山在樂山里

狗兒山在樂山里

珠山在樂山里

藤帽山在城東四十七里山高數千仞雲氣常封

平樂府志

卷二

山川

六

其巔一日有樵者陟峯頂下瞰山肩有平石如掌  
寬畝許緣磴而下至其處有石牀石竈石盆儼然  
天設崖前又有石爐不知何代之物紫荊黃竹參  
差繞列蒼松數尺不土而翠里人禱雨輒應

元帝山在樂山里

福山在樂山里

塘邊山在樂山里

羅山在樂山里

銅牌山在樂山里

仙宮嶺在城北一里高百尺許舊志在龜頭巖二里

宋鄒道鄉謫官儼居於此勝覽通志作城西二里



四望形如金字一名金字嶺非也

金字嶺在城西對江五里四望皆如金字故名

牛嶺在城東百里東鄉里筆頭堡西北高數十丈形如犀

桂嶺在城東五里桂嶺樵歸為八景之一

天門嶺在城東南五十里在賀縣界上有石如門故曰天門

馬鹿巷嶺在城東南八里大教場東

紅花嶺在東鄉里

佛子嶺在城西北十里

上鷄嶺在東鄉里

平樂府志

卷二 山川

巖頭嶺在東鄉里

大嶺有二一在樂山里一在津平里

馬嶺在樂山里

兔兒嶺在樂山里

吹火嶺在城東平嶺盤旋起伏層次夏日酷暑風吹草氣灼人長途煩渴無樹可息故呼為吹火嶺

獅子嶺在城西北通恭城縣逕極險峻

鷄冠嶺在鳳凰山旁

昭潭岡在昭潭旁

舊志

昭潭岡在城北

方輿勝覽

灘樂二

水滙而為潭

郝志

府東二里有昭潭岡一名昭潭洞

杜佑曰長沙郡有潭州以昭潭為名此曰昭州以



崗爲名也

方輿紀要

舊志在昭潭之北今未詳所在

府志

黃牛岡在城西五里金字嶺側後有大石狀如牛  
騎牛坪在長塘東里許平原空濶廣袤十餘里草  
豐水清諸村之牛皆牧於此

龍躍峯在城東三十五里

龍嶽峯在城東北二里爲邑治之祖山

舊志

宋鄒浩

得志軒記云前有峯數十仞曰龍嶽卽此一名龍

躍考槃之水出焉跨澗有橋曰覽勝

名勝志

白雲巖在城東七八里叢林蒼蔚中洞門翼然古  
藤盤繞雖盛暑若居冰屋有石類蓮花者類彌勒  
者類鐘磬者扣之鏗然類犀角者類白衣蒼狗者

平樂府志

卷二

山川

八

燃炬蹲伏而入莫窮其勝洞外百餘武澗水潺湲  
兩岸陡開人跡罕至明崇禎時唐世堯始披榛覓  
逕因石成梁各步雲橋洞中設大士像鑄白玉洞  
天額招老僧守之今荒廢已久

滴珠巖舊名滴水巖在城東山麓大道之旁開闢  
險灘記勒於巖側有亭後人東巖懸溜詩卽此

舊志

在東山麓高不過丈餘石黑如鐵玲瓏秀麗滴溜  
丁丁有古榕盤結於頂

省志

珠巖在東

省志作城北

十五里有洞玲瓏知府羅黃裳

更名迎仙洞

舊志

相傳有異人棲於此丹竈尙存

紅巖在東鄉里



白竹巖在樂山里

梅子峴在東鄉為恭城界

桐木峴有堡

石梯峴在津平東鄉界雙峯插天如筆

舊省志

粉巖在城東南十五里縈山之中巖皆鍾乳結成

玲瓏奇巧幾同鬼斧神工羣山環擁烟霧空濛故

粉巖曉霧為八景之一

牛巖在東鄉里

劉公巖在城西北三十里與陽朔界

當頭巖在樂山里

馬巖在樂山里

平樂府志

卷二

山川

九

瑞山巖在城東三十里東鄉里大寨村高十餘仞

有四巖曰高曰下曰癸水曰大口前代有兵革之

事村民咸避居於此

白漣巖在津平里布塘村寨腳山下巖內有水不

可入

月子巖在城東八里形如斜月外狹中寬

月巖在石面半山中虛圓如月故名

出米巖在樂山里石峯千仞豁然洞開巖形如半

月天宇清曠地勢平爽不似他巖之幽闇險濕其

地荒廢已久甲寅之亂有僧曰修然者避世於此

隨巖中地勢締造精舍不十年頓成名勝巖外磴



道盤旋竹樹茂密入洞左轉石級盡處爲山門地  
平如掌環以墻中有堂額曰石空堂後爲妙明殿  
左轉石巖千仞下臨不測憑空結構曰懸空其外  
周以欄楯可坐數十人樓內諸僧寮舍依崖就石  
如蜂房水渦堂之下右爲香積厨厨旁爲碓磨房  
皆天造地設不假人力向時洞左有二巨石色如  
碧玉縱橫眠側游人每攜鐵錐之石隨錐而下光  
潤堅膩隨形之厚薄小大摩爲鎮紙饒有韻僧欲  
堂殿寬平已鑿而去之矣

水巖在津平里

步雲巖在樂山里一名穿巖舊志穿山巖在城東七

平樂府志

卷二

山川

十

十里樂山里與平西富多山相連府志三峯並立半

壁開一圓竅可通往來各勝志竅圓廣數十丈邑人

袁啟翼卜居其下更名步月巖識云平西富多不

出官出門三步見穿山

顛婆省志作巖在負羶山舊志相傳有一婦佯狂結

宇於此後莫知所終或疑爲冲舉云省志

羊巖山在樂山里

仙巖未詳所在

羅山巖在樂山里布井村方輿紀要云在府城東北八十里巖內

水深澗不可揭乘筏渡之由一黑逕秉燭行百步  
有竅通巔緣梯而上坦平可居里民多於此避寇



焉

竈巖在城北十里

目巖山在城東十五里左右有兩小巖宛如人目

舊志平樂縣有目山 隋書地理志目巖山在縣北三十八

里巖有兩乳相對如人目白黑分明因號為目巖

元和志縣之津平里在虎步江口有廢恭城縣址其

上有目巖高數十丈下有巨石近頂左右有小巖

宛如人目黑白分明 荊州風土記

魯般石在東鄉里榕津渡相傳魯般所鑿欲於此

建橋未就

息石在旱冲旁突立而起高可數仞其上古藤紛

平樂府志

卷二 山川

七

糾垂條著地其下欹側空洞清涼爽塏可坐數十

人行人咸憩於此袁景星以其能覆蔭休息因名

之為息石云

蝦蟆石在城東四十五里雷公山下道傍巨石伏

地形類蝦蟆水從口出其餘山畔小石不下數百

靡弗形像畢肖諺云此蟆母吐水蟆子食也今其

鄉尚呼為蟆拐石云

陶李洞在城東南九十里唐太尉陶英與李太尉

卜居昭州後世子孫遂世居於此 舊志有二仙廟相

傳唐太尉陶英謫居與李氏聯姻後此二姓居崗

數百家為婚姻云 方輿勝覽唐天祐二年太尉陶英忤



朱全忠因授征南將軍出鎮昭州故以疎之全忠  
篡位懼禍隱於誕山家焉時有李太尉者簪纓相  
似子孫累代締姻其山下有峒因目爲陶李峒名勝

志明太守羅黃裳構亭今廢省志

四十里山在府東北龍平巡司南十里周四十里

因名爲富賀往來要道設三堡以爲戍守方輿紀要

糯洞在水漣營有堡

兜洞在水漣營有堡

石洞有二一在水漣營有堡一在下廂

栗洞在水漣營有堡

義洞在車陂獠境內有堡

平樂府志 卷二 山川

嶺背洞在上廂

長洞在水漣營

南源洞在津平里

蕉洞在上廂

藍洞在車陂獠境

黃洞在藍洞西二里與昭平陶溪村交界

小洞在下廂

六工洞在下廂

牛洞在東鄉里

莫家洞在東鄉里

關門洞在東鄉里



牛廟洞在東鄉里

石人洞在樂山里

楓魚洞在樂山里

羊尾洞在樂山里

泚洞在樂山里

下裏洞在津平里

欄洞在水滄營

昭潭洞今未詳所在

灘水在城南源出興安海陽山東南流經靈川臨桂陽朔興平之水入焉又義寧靈鷲之山義江分流入于永福東流入灘至平樂合荔二水下蒼梧

平樂府志

卷二 山川

三

至廣州府入海戈船將軍下灘水即此

府江水即灘曰府江者別于左右二江也迤演五百餘里兩岸皆山多懸岸峭壁為灘三百六十合邑境諸水暨洛江水歸化水思勤水思鹿水馬江諸水流入蒼梧境昔人諺曰盍有一斗米莫溯藤峽水囊有一佰錢莫上府江船其視為畏途如此今則悉化為坦途

樂水源出富川上鄉合桃川水流經恭城入邑境之樂山里合誕山江沙江洛川諸水至城下入於灘舊志平樂溪水出臨賀郡之謝沐縣南歷山西北流逕謝沐縣西南又西南流至平樂縣東南左會



謝沐衆溪派流奏合西逕平樂縣南又西南流注

於灘水謂之平樂水水經注平樂溪在平樂縣南三

里又永平縣南臨永平水西流入平樂縣界元和志

平樂江中有縣藤灘黎壁灘寰宇記

平樂江自湖南永明縣流逕恭城縣南又西南逕

府城東北又西南入灘江舊志今所名樂川水出恭

城至平樂合誕山沙江諸水入灘一統志入景之二

曰樂水拖藍

平溪水在城南三里流入昭潭合灘水東南流入

昭平縣界

魯溪江出魯溪山流至東鄉胡志魯溪水在府東源

平樂府志 卷二 山川 古

出魯溪山之分水塘流逕平樂縣東鄉曰魯溪出

龍平巡司曰澇源江出恭城曰上平江出富川曰

白藁江又分流入賀縣永明等縣境灌溉之利甚

溥方輿紀要

沙江水源出東鄉里四十里而西流入於魯溪至

榕津與誕山江水合流至津平里滙樂水同注於

灘

誕山江水在樂山里源出誕山流至陶村合下龍

蒸水流至榕津與沙江水合流入樂水同注於灘

澇源出魯溪山流至龍平人灘

荔水源出修仁過荔浦流至邑境於城西七里合



湖塘江水注於灘八景之七日荔江漁唱  
湖塘江水流至城西荔浦江口合修荔諸水入於  
灘

洛川水源出恭城南平江至矮山過鳳凰巖經蛇  
灘合樂水流入於灘

大桐江小桐江水俱出獐境流入於灘

大浪溪水自兩山中出曲折而注於灘涉處頗廣  
雨餘暴漲波濤涵湧行者旁皇大浪之名所自來  
矣

北澗水在城西北水中有石名磨刀石水從石上  
流高於道者尺許景極幽奇澗旁石壁多杜鵑春

時花放儼若錦屏洵為一邑名勝

考槃澗水在城東一里源山龍嶽峯澗口一名廻  
龍津入於灘八景之五日考槃清風

昭潭在城東一里灘樂二水匯而為潭通志云下  
有十八灘未詳所謂胡志昭潭縣東一里又名昭岡

潭下為十六灘最險峻昭潭驛沿其名金志平樂水  
之西岸有昭潭周廻一里其深不測元和志昭潭亦

名廻龍潭灘樂之水匯而為潭今城西有灘曰虎  
準灘自昭潭而下有韭菜三門等灘在東五六里

皆川流險峻處也方輿紀要諺曰昭潭無底橘洲浮昔  
入覆舟於此沉其銅甌甌有銘題後於洞庭湖中



得之疑有潛穴相通耳按此諺為楚中昭潭省志誤引

廻龍潭在城東考槃澗下明萬歷中副使翁汝進

於東岸山勒石云細魚乃民食所關不能斷絕廻

龍潭改名放生潭

虎埠潭在津平里樂川之中

滑石潭在城北十里與陽朔縣交界

鰕魚潭在城西北滑石灘下

牛皮潭在東鄉里

漣漣潭在北澗中

龍池在舊府學西上有仙妃廟八景之三曰龍池

春暖舊志

平樂府志

卷二 山川

去

虎埠灘在津平里樂川中虎埠潭下

更鼓灘在城西五里荔浦江口

漫灘在城西北五里荔浦界

滑石灘在城北十里灘江下界陽朔

鰕魚灘城西北滑石灘下以上三灘至冬月水涸時賊得褰裳而渡舊有

哨堡守焉

鷺頸灘在印山之上一作下

茭菜灘在城東五里昭潭之下

狗毛灘

三門灘在茭菜灘下有二石對峙水中流為三門

中多暗石頗碍行舟



石鼓洲灘在三門灘下有險石

石母灘在石鼓洲灘下有石龍壩水勢湍激

永灘在石母灘下

橫灘在永灘下右有石磯左係淺水砂洲水勢湍

激且多暗石頗碍行舟或自左邊挑浚深直可免

右岸之險

浪灘在城東南橫灘下 以上在底塘界

長灘在城東南二十里浪灘下舟行取道中流灣

淺長隘西岸沙洲多有浮石約三丈餘

茶田灘

鷺鷥磯灘在長灘下

平樂府志

卷二 山川

響水灘在鷺鷥磯灘下在沙嘴江中有石洲洲之

上水大則衝為旋渦舟行殊險

火把灘

廖家灘在長灘下五里水道淺窄而東岸有砂洲

碍道

叢林灘

上危灘在廖家灘下

下危灘在上危灘下

崩山灘皆砂洲在龍磯上

分砂灘在崩山灘下 以上在長灘塘界下

龍頭磯灘府南三十里



蓑衣灘磯

鎌刀灣灘在龍頭磯下 以上在龍頭磯塘界下

小結灘在大結灘和尚磯之上江中多浪石

大結灘在大結塘下塘前有巨石二塊碍路江中

多暗石水勢湍激東岸為和尚磯舟行頗險

鑼鼓峽 以上在大灣塘界下

浙瀝灘在大結灘下

鼓鑼峽縣東南三十二里龍頭磯下有石如鼓鑼

水漲則洄洑旋轉舟不敢行 一統志

龍門峽府東南百餘里府江中今名松林峽冬日

水小極險惡明萬歷中加開鑿漸為坦道 方輿紀要

平樂府志

卷二

山川

六

薩喇灘在浙瀝灘下東岸山下有石橫江濱

小龍灘在大結灘下五里東岸有山嘴西岸多浮

石舟行宜避

大龍灘在大貝灘上七里西岸有亂石東岸有磯

嘴水頗湍激灘下亂石益多殊碍行舟 以上在大

結塘界下

大貝灘在廣運塘下二里江中多石而岸傍之石

益險

小貝灘在廣運塘下五里兩岸多碎石水道紆迴

灣淺而湍激直下中有欄杆石

石龍灘在小貝灘下



標灘在石龍灘下有險石

白蓼灘皆砂洲在標灘之下

金鷄灘在巴江塘之上白蓼灘之下有小石踞江  
中 以上在廣運塘界

小黃牛灘在大黃牛灘上

大黃牛灘在黃牛塘下二里東岸有花水浮石扁  
舟過此恒有戒心 以上在巴江塘界

豬牙灘在黃牛塘下七里東西兩岸俱有浮石舟  
過則長年恒惴惴焉

象棋灘在豬牙灘下東岸有石磯五水勢湍激

栗灘在象棋灘下與昭平交界

平樂府志

卷二 山川

勞碌灘

符箕灘 以上在黃牛塘界

母灘

掙灘 以上在蓬冲塘界入昭平界

竹篙峽在樂山里

洗馬磯在南門外

龍門磯在城東南三十里有大石橫截江中而障  
以砂洲其水深多暗石盤亘頗碍行舟

和尚磯在城東南小結灘下

鷺鷥磯在城東南二十二里廖家灘下

楓木磯在城東南龍頭磯下山嘴與碎石插入江



中水勢至此一曲當江流暴漲時直冲西岸轉而冲迴東岸致成漩渦石多附山工力難施

顛倒磯在大灣塘下二里東岸有巨石二橫亘江中

石磯在城南俗呼為石磯頭頗險

金蛟有二一在城東南鷺鷥磯上一在水漥營

龍溪塘在樂山里有洞壑泉從石洞中湧出省志

龍頭堤縣西北明御史何祺築志一統明宏治正德

年間恭城江水屢漲將前街衝為巨浸以致學宮

漂沒民舍蕩析區區城闔僅恃後街一綫以幾幸

且夕至萬歷三十年知府張一棟詳允三院建立

石堤引水而西起亭子脚迄上冲口計長八十五丈濶六丈高二丈五尺水患始息因為久遠計將清出絕戶莫如試田二百六十工招佃承墾歲入租粒除納正貢外餘銀為修築之需康熙二年里書誤將此租造入奏銷內自此修築無資而堤日就傾頽矣

恭城縣

五馬山在縣南一星五峯亭立如馬奔躍來朝邑堂

鳳凰山在縣東三里兩峯開豁中峯昂聳如鳳舊縣址在其下



獅子山在縣西

鷺山城南八里

三台山縣南三十里儒學賓山三峯聳翠形如筆架傍有馬鞞山

金龍山在縣西二十里舊志日落時有龍影繞山舊志

曬袍山在縣西南五里統志作三里春夏草碧為

綠袍秋冬野燒後為青袍舊志諺有出門莫問天但

看晒袍山殊驗舊省志

天馬山在城南八里學宮對峙

筆山離城二十里對峙學宮

平樂府志

卷二

山川

三

石佛山在縣東十里高廣約里許半山有巖巖內石滴水結成一佛佛前兩石柱似燭居中一石似爐人因呼為觀音坐殿岩前有塘深不可測擲石聲如雷久旱鄉人以犬祭之即雨

印山在縣後一里形如印方廣約里許高十餘丈昔有居民今荒廢

馬鞍山在縣東十五里高約三十餘丈形如馬鞍五指山在縣北八十里五峯並起中峯獨高形如豎掌高百餘丈週圍約五里路通灌陽

龍岩在縣東五里形如卧牛山麓一岩中有水深莫可測每遇旱年鄉人用生鷺一隻巫師書符



鷺背至岩口放入風雨立應或云有龍在焉

吉山在縣北五十里昂聳獨立端秀可愛以鎮北

鄉水口

牛角山在縣北八十里曲秀侵雲後有一岩夏涼

冬煖幽爽可人昔人多入內讀書因稱為書房岩

銀殿山一名兼山在縣東百里高萬餘丈勢侵雲

漢山頂雖盛暑如冬頂分兩山因名兼山橫視如

銀錠故又名銀錠頂上有池水約五尺深清碧可

愛池中一石如几池傍有竹數百斜垂如簾拂石

塵舊志兼山昔異人號兼山先生深明性學隱於此

舊通志銀殿山縣東北八十里嘗有白雲覆其上望

平樂府志

卷二

山川

三

之如宮闕名勝志去富川縣百五十里舊馮乘縣山

上有白雲故名銀殿

羊角山在縣西二十里遍山亂石形如羊角故名

二童山在縣西南二十里近平樂縣界兩山並聳

高約六七十丈中間平坦處有大石一方俗名二

童講書舊志按省志有雙童山縣西五里鄉舉多聯發或云此山之秀

仙姑山在縣北八十里高約二里許三峯並出其

中峯石壁陡絕處上有手攀掌印下有足踏印俗

謂仙人遺跡傍一小石清泉不乾俗呼仙女梳頭

水天旱祈雨屢應里人德之因立廟山下廟傍又

一水四季長流名曰東溪左右田數百畝賴此灌



溉舊志俗以泉爲周何二仙女洗頭盆水舊省志

道公山在縣東二里一帶土山忽出石峯高約十餘丈頂上一石儼若黃冠又一石如手執笏前有圓石磊磊供儀下有一石如指形俗呼爲道人下墓

石盆山在縣西二十里石骨峻嶒方廣約二三里左有岩如盆深不可測水色澄碧長流不竭夏秋閒時或不雨而漲鄉人汲飲且資溉田岩內出魚名遊風魚形似鱮黑身細鱗圓大如指長僅一二寸味極甘滑里人珍之率以穀兩前後羣出夏至後歸岩出入歲有常期漁者以筌取之其右山半

裂開一口如門不數武仍合內僅開二小孔大如盃徬生蔓藤四時常清春夏連雨孔內並無水出或天時久晴反出水其水黃濁而溫每歲不過一二次下有田十餘畝早年賴此水獲全收

卧雲山在縣北七十里昂聳侵霄常有白雲繚繞其上山頂有庵舊名望雲庵庵前有清泉徬開一洞寬平約五丈餘幽爽可人康熙乙酉教諭封安邦名其庵曰卧雲窩

平島山在水西方輿勝覽云唐葉靖祖墓在此靖有道術嘗與明皇乘雲幸陳滿堂家每歲必來省墓去墓十里有大悲寺元豐初有客葉姓者借宿



於寺因口占詩八句僧僅記其結句詰且啟戶人

馬遽失名勝志

島坪山在縣西八十里高數百丈層巒叠嶂綿亘

一方中開有平坦處舊志縣西五十里西江水出此

一統志

掛榜山在縣南二十里

高峯山在縣南十餘里一峯亭立插入天表高莫可量

北山聳形如獅頂平約三丈卽解元周嘉賓讀書處有八景俱有題咏今石壁字句剝落不可曉

冬熱嶺在城西五里高峻行者寒天汗浹舊志云

平樂府志

卷二

山川

三

相近有東華嶺

七星界在縣西七十里高約數百丈磊落形如七星

燕子巖在縣南高約十餘丈逼臨溪邊常有燕子

集巖內春來秋去巖下水色澄碧深不可測舊志縣

南一里外峻中寬頂平如石巖如燕巢然其相近

者曰獅子山方輿紀要

鳳巖在縣北七十里解元周嘉賓讀書處

峻巖在縣北六十里宋進士周述讀書處

甌頭山巖在縣北八十里宋寶祐元年進士周元

鶚刊文石壁高險難登好事者攀躡見詩文爲岩



溜蝕盡僅存石瘦梅枯花數點月明風靜鶴雙棲  
之句

石角巖在縣東三里

魚田巖在縣西三十里八角巖村泛舟從巖日入  
凡數楫見鳥語花香非復塵世沙平水曲樹斷雲  
連遊者忘歸

蟠駝石在城東四里橫澗可二丈宋御史周渭幼  
常牧牛於此後人刻御史臺三字以紀之

省志

穿巖在縣西十五里山石聳翠中則玲瓏洞口澗  
二丈餘高如之水自島坪源來岩中流過山石橫  
跨水口如象鼻如伏犀漁舟出入棹聲人語響答

平樂府志

卷二

山川

五

如雷潭水沉碧其深莫測旁有石柱高與巖齊圍  
數尺若珊瑚樹擊之鏗然如鼓一邑山水之奇勝  
無逾於此

舊志

一名大梧巖

方輿紀要

響水巖在縣百九十里近灌陽崇順嶺界一派石  
峯中開洞口高萬丈險峻難入但聞水聲響似雷  
鳴有龍王廟歲旱祈雨屢驗

佛巖在縣北九十里一山秀如雲中山半有巖寬  
長約三丈餘中供佛座巖左有石盆形似荔枝因  
名荔枝盆盆中水常不涸足供僧食巖右有石笋  
一條從巖頂生約長丈餘上似龍頭有鳳尾草一  
莖常青其下笋頭微出清泉山僧以器盛之烹茗



極佳宋進士田開讀書處

金芝巖在縣東五里

福田巖在城北二十五里

斗八巖在縣西三十五里八角巖村前山腰一巖高三丈餘濶二丈餘中多石乳下有清水橋水聲與巖相應

裂石西鄉遼川村寬五尺餘長九丈中一溝大如池時出盈尺之魚有大至一二十觔者鄉人取之從東穴去不知所之

風石在縣北七十五里擊之生風

鯉魚石在縣東亘江中形似魚

黃牛石在邑南關外半里許石色赤高丈餘方廣約二丈形似牛俗呼曰黃牛石

馬跡石在馬跡崖邑北六十里形似馬傍一石如人紫紅色早年童子赤身以泥塗之卽雨

蓮花石在縣西八十里綿亘一方路通陽朔臨桂灌陽羣峯羅列高入雲中有一坪坪中列數石形如蓮花

永明大河自湖南永明縣源口猺發源出桃川市由龍虎關過常家司白羊堡經恭城縣南門至平樂縣城八十里與灑水合其淺處僅丈餘深處或十餘丈兩岸狹處或五六丈寬或十餘丈不等



東江大河一統志

南平江在城南二十里源從勝崗出會大江

勢江源出小河從伸家猺發源由勢江猺山子角

塘邊村庄子埠等處出平樂牛路冲合大河其淺

處僅數尺深處或三五尺兩岸狹處僅丈餘寬處

或五七丈不等胡志勢江縣東四十里一統志

上平江源出平樂魯溪山胡志縣北七十里續通一

名平川江源出縣北灌陽界平川南流過常家渡

歷縣北六十里入樂川舊省志

北洞源小河從銀殿山發源由北洞過車洞灣出

龍肚裏陂會大河其淺深寬狹與勢江小河同舊志

平樂府志

卷二 山川

三

縣東十五里一統志

坪川源縣北九十里會大江

下山源小河從銀殿山發源由下山源過甑山寨

高嶺出螞蝗塘爐口會大河其淺深寬狹亦與勢

江小河同舊志縣東十五里省舊志

平源猺小河從永明縣發源由黃茅嶺過平原上

五排下五排經巖口磧頭山下寒合栗木河出常

家司會大河其淺深寬狹亦與勢江小河同

馬坪小河從蓮花石發源由雙溪寨過何頭寨費

村出川巖會西水大河其淺深寬窄亦與勢江小

河同



富川縣

川巖在縣西六十里

馬鞍山治東一里上有文昌閣舊志南首鐫第一峯

三字北首鐫誥軸山三字縣志

鳳凰山縣東二里南接雲梯嶺西曰朝冠山又東

曰尖山大山有唱歌巖廣輿記歌山卽此縣志

朝冠山鳳凰山稍西

穿山朝冠山東二十里上有巖曰仙巖洞門有垂石以挺擊之一若磬一若鼓又有蒼藤數根從上直下形如石柱從上蓋覆之石有五色形如蓮花有乳滴下夷坦可坐十數人深潭潺潺然莫測其

平樂府志

卷二 山川

天

去來石梁橫亘亦奇境也周篤裴修之舊志仙巖在

縣治十餘里洞口多桃花中則寬濶上如覆蓋石

芝懸結青黛點綴榕根三四條如絲拂直垂入地

半山閒開牖光明中擁石堆如假山狀可坐數人

文載洞門刻洞口雲封四字縣志

白馬山縣南五十里下有白馬泉一統志相傳曾見

白馬懸韁於此舊省志旁有合掌石刻隋樂安縣君

蔣氏神道碑縣志

虎山離縣二里有巖曰龍水

石門山離縣二里門僅容一人四面峭壁不可上

下其中平原廣疇居民百餘家儼然一桃源也



豹山離縣三十五里其陰有洞一統志農人望雲占晴雨可驗舊省志

隱山離縣四十里潛德巖在焉胡志隱山縣東四十

里一統志宋林通歸隱讀書巖中有林公石牀四大

字舊省志潛德巖縣東二十里俗呼讀書巖巖在塘

中石峯峭立巖深廣數丈仰鑄潛德巖三大字刻

宋元豐辛酉年材通達夫識縣志

通山有洞曰祥雲在縣東五十里

西屏山縣西五里邑之鎮山峯巒排列高插雲霄

自北而南綿亘百里溪源百道分注東江上有瀑

布縣志

平樂府志

卷二 山川

三

秀山縣西北四十五里朝東村中拔地五十餘丈

其東有雙雞石相傳土人常聞雞聲何姓世居於

此縣志

屏山縣西三里

靄石山縣北一里舊志山高聳四時常有烟靄冒於

峯頂方輿紀要明置守禦千戶於靄石山下明一統志

興雲山在靄石山北一里以雲興而雨至也方輿紀要

在縣北三里巖前有龍湫山頂有一石盤寬三尺

許中有一石如鶴天將雨石壁呈霧巖內出雲龍

湫閃電舊省志縣北三里巖刻興雲巖三大字中有

石砌流水相傳昔人讀書於此縣志



湖完嶺縣東北九十里湖廣至此而完故楚粵東  
西分界處縣志

獅子山縣南七十里逆距江流儼然形似縣志

文筆山兩峯尖聳如雙筆

峽頭山富水經焉舊志在縣南三十里一統志作二十里又

有峽口山縣西北十里一統志作縣西七十里亦曰峽頭皆

以兩山夾川而名

白雲山去縣五十里乃丹霞福地方輿紀要縣南一百

二十里旁有丹竈山下有竈溪水道書所謂丹霞

福地方輿紀要相傳張道陵煉丹所石曰尙存舊省志

穿石山有巖爽朗道人莫公曾居於此離縣四十

平樂府志

卷二 山川

里舊志

龍山在縣北八十里龍溪之水出焉

寶劍山在縣東北六十五里一石如劍故名縣志

鐘山在縣西南七十里富川舊置於此又置邊蓬

巡司一統志今廢舊志上刻狀元峯三字下有文昌閣

東爲舊縣鐘山寺故址縣志鐘山在鎮中叩之如鐘

故名里許有碧雲洞

碧雲巖在縣南巖洞深邃洞上有石脉成三大字

曰廣陽島名勝志距鐘山里許寬厰深邃奇異萬狀

一統志廣陽島三字遠望分明近視如擘絮狀又有

古石刻舊省志俗名官巖洞中有數盤石叩之聲聲



然俗謂天師石鼓宋靖康元年上巳蔣燮來遊題  
名石壁縣志

東山在縣東七十里高峯插天白雲常阜之產錫  
鑛卽臨賀嶺又名桂嶺於五嶺號萌渚界連三廣

縣志東山其上多梓梗俗呼爲姑婆山絕壁參天界

連三廣昔富賀餘黨多竄於此舊志

郎山在縣東北五十里中有穿石巖石上有請尋

樂處四字宋鬱棠拙林御史隱此舊志去縣北八十

里鬱棠今呼月塘宋御史周英糾所闢縣志有石

竈煉丹所又有石棋局舊省志與龍溪山相近方輿紀要

龍頭山碧溪之水出焉離縣五里

平樂府志 卷二 山川

馬頭山形如馬首離縣東十里

歌山在古馮乘北唐已入江華界矣不在邑境昔

馮乘有老人自少不婚善謳聞者流涕及病死鄰

人送葬到此歌以送之名勝志作將死鄰人送之此山老人歌以爲別覺

餘音滿谷數日名勝志作月不絕寰宇記

獨秀巖靄石山北內有石窻石磴相傳古人曾讀

書於此

桃母巖離縣四十里舊志水湧平地多產桃名勝志相

傳老姆種此歲凶採實充饑樹特繁盛舊省志

秀峯離縣七十里平地突起千仞毛氏族居於此

舊志秀甲雲表一統志昔毛袁刺賀州過而異之遂家



焉舊省志

秦山一名桂嶺在縣北三十里高二千餘仞南接富川北連道州吳孫權未立時山忽聞有雷聲因開七洞南北可數十里水出其中有石鼓石池石壇寰宇記陳去非有遊秦山詩方輿紀要昔傳仙人所居名勝志

斜嶺在縣東南九十里南至賀縣五十里分界處方輿紀要

花山在縣西九十里堆藍罨翠勁栢蒼松交枝絢綠密萼爭妍為一邑之名勝

紅巖山在縣南二十里巖通數里內有深潭不知

平樂府志

卷二 山川

三

所抵

枒叔巖在縣南三十里迴峯疊嶂道路崎嶇知縣張文耀砌石道建行春臺今廢

四山嶺鐘山西八里即鎮之祖山縣志

長標嶺離縣九十里唐李靖次師於此土人立廟祀之舊志縣北六十五里李靖收嶺南地駐師植長

標於此省志

西溝水發源於西屏山經縣南會於富江

橋頭江縣南三里縣志作五里盧溪之水出焉東流注

於富江又合將軍水過峽頭至鐘山三水東流入賀南入於海



洋溪縣北十里東注富江山顛有龍湫天旱祈雨

輒應金省志

竈溪在縣南一百二十里丹竈山下相傳張道陵

煉丹取水於此縣志

西鄉水發源槽碓源經白霞下昭平縣志在縣西五

十里省志

瀉源在縣北二十里出塘背北流舊志下九嶷入瀟

江方輿紀要

秀溪去縣七十里發源石姑合永之沐水昭之灘

水下蒼梧入海

碧溪在縣南五里源出沙平西流合灘江

平樂府志 卷二 山川 三

白葉澗源出平樂魯溪山西流入灘

富江發源於靈亭鄉南合神源之水經縣治東南

流入於賀

白水一出縣西岸一出縣東三輦源由沙母流出

茶源匯焉